

## *ETUCE/EFEE završna konferencija u Briselu, 14-15. oktobar 2019. godine*

U Briselu je u periodu 14-15. oktobra održana završna konferencija zajedničkog projekta Evropskog komiteta sindikata obrazovanja (ETUCE) i Evropske federacije poslodavaca u obrazovanju (EFEE) pod nazivom *Evropski socijalni partneri u obrazovanju promovišu efikasnu integraciju migranata i izbjeglica u obrazovanje*. Konferenciji je, u ime Sindikata prosvjete Crne Gore, prisustvovala Aleksandra Kuč, član Izvršnog odbora SPCG-a.

Na konferenciji su ETUCE i EFEE organizacije članice diskutovale o svojoj ulozi u promovisanju uspješnih praksi inkluzije učenika i studenata migranata i ujedno se obavezali da će unaprijediti svoj socijalni dijalog u cilju pronalaženja praktičnih i konkretnih načina za promovisanje integracije djece migranata i izbjeglica u obrazovanje. Promovisanjem vrijednosti inkluzije i inicijativa socijalnih partnera, ETUCE i EFEE imaju za cilj podsticanje kvalitetnog obrazovanja kao ključnog elementa koji pruža jednake šanse svima, pomaže u borbi protiv marginalizacije, diskriminacije i socijalne isključenosti najugroženijih, najčešće migrantskog porijekla.

Konferencija je bila prilika da stručnjaci u oblasti migracija i inkluzivnog obrazovanja, edukatori i ostale zainteresovane strane razmijene svoja znanja i iskustva i diskutuju o nacrtu zajedničkih smjernica o promovisanju djelotvorne integracije novopristigle djece svih uzrasta kroz efikasni socijalni dijalog. Ove smjernice daju predloge direktorima škola, nastavnom kadru, sindikatima obrazovanja i federacijama poslodavaca na koji način da proaktivno uspostavljaju strategije i modele za uključivanje pomenute djece u sistem obrazovanja, kako u tranzitnim tako i u odredišnim zemljama. Na konferenciji su, kao i na prethodnom seminaru koji je održan u junu mjesecu na Kipru, ujedno iznijeta iskustva i teškoće u radu u našoj zemlji, ali ne sa izbjeglicama i migrantima, već sa Romima (jezičke barijere, kulturološke navike, potreba za promjenom boravka, asocijalnosti).

ETUCE i EFEE sa svojim socijalnim partnerima iz čitave Evrope ukazali su na značaj interkulturalnog dijaloga i spremnost obrazovnih institucija za uspješnu integraciju učenika i studenata migranata, snažno vjerujući u kompetencije nastavnika, edukatora i uprava obrazovnih ustanova. Predstavljeni su rezultati tri studijske posjete i iskustva u radu u Španiji, Srbiji, Belgiji, a na konferenciji su precizirani ključni faktori za poboljšanje stepena integracije migranata u sistem obrazovanja: inkluzija zasnovana na punoj podršci, kontinuirani profesionalni razvoj nastavnika, saradnja sa partnerima, lokalnom i širom zajednicom i unapređenje socijalnog dijaloga.

Drugog dana konferencije za predstavnike ETUCE i EFEE organizacija članica je organizovana posjeta Evropskom parlamentu u cilju učešća u javnoj raspravi u vezi sa migracijama i obrazovanjem. Poseban dio rasprave je bio usmjeren na temu *Inkluzivno, pravično i kvalitetno obrazovanje dostupno svima - pristup migracijama, azilu i obrazovanju zasnovan na ljudskim pravima*.